



# JORNAL da REPÚBLICA

§ 0.50

PUBLICAÇÃO OFICIAL DA REPÚBLICA DEMOCRÁTICA DE TIMOR - LESTE

## Número Extraordinário

### SUMÁRIO

#### GOVERNO:

**Rezolusaun Governu nian N. 26/ tinan 2020**

**Loron 5 fulan Agostu**

Aprova Rejimentu Konsellu Ministrus nian ..... 1

#### REZOLUSAUN GOVERNUNIAN N. 26/ TINAN 2020

**Loron 5 fulan Agostu**

#### APROVA REJIMENTU KONSELLU MINISTRUS NIAN

Alterasaun sira ba orgánika Governu Konstitusionál VIII, husi Dekretu-Lei n. 20/2020, loron 28 fulan-maiu no husi Dekretu-Lei n. 27/2020, loron 19 fulan-juñu, impoin nesidade atu altera Rejimentu Konsellu Ministrus nian, ne'ebé aprova ona husi Rezolusaun Governu nian n. 8/2020 loron 19 fulan-marsu, atubele akomoda reorganizasaun kona-ba membru Governu sira-nia kompeténsia sira. Liuliu, importante atu halo revizaun ba regra sira kona-ba prosedimentu lejizlativu Governu nian, ho konsiderasaun ba integrasaun kompeténsia sira reforma lejizlativa nian, iha Prezidénsia Konsellu Ministrus. Rejimentu Konsellu Ministrus nian kontinua nafatin hanesan instrumentu ida ne'ebé esensial ba funsionamentu kolejiál Governu nian, ne'ebé impoin jenerikamente husi spesifisidade orgánika nian sira husi Governu ida-idak. Rejimentu Konsellu Ministrus nian daudaun ne'e buka atu mantein importánsia desiziva husi momentu desizaun halo lei nian, ne'ebé bele orienta loloos prosedimentu lejizlativu nian, iha kazu ida-ne'e, liuhusi fundamentasaun ba desizaun ne'e no hatama iha planu lejizlativu Governu nian ida, ne'ebé hetan avaliasaun regulár. Ida-ne'e maka rezultadu husi esperiénsia reforma lejizlativa husi Ministériu Reforma Lejizlativa no Asuntus Parlamentares

nian ne'ebé estinge ona, ne'ebé mak aleinde Rejimentu Konsellu Ministrus nian, inklui mós ona revizaun ba regra lejistika nian sira, liuhusi Rezolusaun Governu n. 21/2019, loron 26 fulan-juñu. Mantein mós, iha versaun atuál, konteúdu esensial husi dixiplina rejimentál ida uluk, ne'ebé ninia objetivu mak atu simplifika prosedimentu lejizlativu no evita duplikasaun husi intervensaun husi interesadu sira iha momentu hasai paresér obrigatóriu no iha tempu tuirmai bainhira halo sirkulasaun diploma sira-ne'e nian molok tau iha agenda Konsellu Ministrus nian no reforsa mekanizmu sira kona-ba artikulasaun kontributu oioin ba prosedimentu lejizlativu.

Nune'e,

Governu rezolve, tuir alínea p) husi n. 1 artigu da-115 Konstituisaun Repúblika nian no husi n. 3 husi artigu da-5, Dekretu-Lei n. 14/2018, loron 17 fulan-agostu, ne'ebé hetan alterasaun husi Dekretu-Lei n. 20/2020, loron 28 fulan-maiu no Dekretu-Lei n. 27/2020, loron 19 fulan-juñu nohanesan tuirmai ne'e:

1. Aprova Rejimentu Konsellu Ministrus nian, ne'ebé maka hakerek iha aneksu rezolusaun ida-ne'e, ne'ebé halo parte integrante ba rezolusaun ne'e;
2. Revoga Rezolusaun Governu nian n. 8/2020, loron 19 fulan-marsu.

Rezolusaun ida-ne'e tama iha vigór iha loron tuirmai hafoin ninia publikasaun.

Aprova iha Konsellu Ministrus, iha loron 1, fulan-jullu tinan 2020.

Publika kedas.

Primeiru-Ministru,

**Taur Matan Ruak**

**ANEKSU  
REJIMENTU KONSELLU MINISTRUS NIAN**

**Kapítulu I**

**Kompozisaun no funsionamentu Konsellu Ministrus nian**

**Artigu da-1  
Kompozisaun**

1. Konsellu Ministrus prezide husi Primeiru-Ministru no integra aleinde nia, Vise-Primeiru-Ministru sira, Ministru Prezidénsia Konsellu Ministrus nian, Ministru Koordenadór Asuntus Ekonómikus no Ministru sira seluk.
2. Membru Governu sira seluk no entidade sira ne'ebé hetan konvite ka konvokatória espesial, liuhusi indikasaun Primeiru-Ministru nian, bele mós partisipa iha sorumutuk Konsellu Ministrus, maibé la iha direitu ba votu.
3. Membru Governu sira ne'ebé la'ós Ministru ka la'ós substitutu husi Ministru sira ne'e nian, bele partisipa iha Konsellu Ministrus bainhira hetan duni autorizasaun husi Primeiru-Ministru.
4. Partisipa mós iha Konsellu Ministrus, Sekretáriu Estadu sira ne'ebé depende direktamente ba Primeiru-Ministru.

**Artigu da-2  
Auzénsia no impedimentu sira**

1. Iha Primeiru-Ministru ninia auzénsia ka impedimentu, entidade ne'ebé maka sei substitui nia maka Vise-Primeiru-Ministru ne'ebé nia indika ka, hanesan alternativa, tuir orden presedénsia ne'ebé estabesele ona iha orgánika Governu nian.
2. Iha Ministru ida-idak ninia auzénsia ka impedimentu ruma, entidade ne'ebé maka sei substitui sira maka Vise-Ministru ka Sekretáriu Estadu ne'ebé fô tulun ba sira ka sira rasik indika ona ba Primeiru-Ministru.
3. Ba saida maka hakerek iha número hirak liubá, auzénsia no impedimentu ruma tenke komunika antes ba Primeiru-Ministru, liuhusi surat, no ho asinatura husi membru Konsellu Ministrus nian ne'e rasik, ho koñesimentu ba Ministru Prezidénsia Konsellu Ministrus.

**Artigu da-3  
Sorumutuk sira**

1. Konsellu Ministrus hala'o sorumutuk ordinária iha loronkuarta, iha tuku 9 dadeer, exetu bainhira Primeiru-Ministru determina oin-seluk.
2. Sorumutuk Konsellu Ministrus nian sira hala'o iha Palásiu Governu, iha Dili, ka, tuir determinasaun Primeiru-Ministru nian, bele hala'o iha fátin seluk iha territóriu nasional.
3. Konsellu Ministrus hala'o sorumutuk estrordinária bainhira de'it Primeiru-Ministru konvoka atu hala'o ka, karik nia auzente ka iha impedimentu ruma, husi Vise-Primeiru-Ministru ka husi Ministru ne'ebé maka substitui nia.

**Artigu da-4  
Lian sira**

Lian sira ne'ebé utiliza iha sorumutuk Konsellu Ministrus nian maka lian portugés no lian tetun, ho de'it exesaun bele halo apresentasaun balun ne'ebé ho espesifisidade téknika ho lian serbisu nian hirak ne'ebé hatuur ona iha Konstituisaun.

**Artigu da-5  
Orden traballus**

1. Sorumutuk ordinária Konsellu Ministrus sira nian kumpre orden traballus nian ida, ne'ebé prepara iha agenda ida, ne'ebé maka propoin husi Ministru Prezidénsia Konsellu Ministrus, no aprova ona husi Primeiru-Ministru, sein prejuizu ba dispostu iha artigu da-3.
2. Orden traballus husi sorumutuk ida-idak Konsellu Ministrus nian inklui parte sira tuirmai ne'e:
  - a) Parte dahuluk, kona-ba konfirmasaun ka alterasaun orden traballus, tuir konsensu ka tuir determinasaun Primeiru-Ministru nian;
  - b) Parte daruak, kona-ba apresiasaun ba projetu lejizlativu sira, ba projetu atu sira ho natureza regulamentár no ba rezolusaun sira, nune'e mós ba delibersaun sira seluk ne'ebé sai nu'udar kompeténsia Konsellu Ministrus nian;
  - c) Parte datoluk, kona-ba estudu sira, dokumentu sira ka forma apresentasaun nian saida de'it kona-ba asuntu ka matéria sira ne'ebé, Primeiru-Ministru konsidera katak tenke debate iha Konsellu Ministrus.
  - d) Parte dahaat, kona-ba diskusaun ne'ebé iha relasaun ho situasaun política atual, karik Primeiru-Ministru konsidera katak importante;
  - e) Parte dalimak, kona-ba aprovasaun ba agenda ba sorumutuk tuirmai.
3. Hafoin hetan tiha aprovasaun, orden traballus definitiva ne'e sei haruka kedas ba membru Konsellu Ministrus sira hotu, atu sira bele simu kedas to'o loron-terça anteriór husi loron sorumutuk nian, exetu kona-ba sorumutuk estrordinária ka kazu exesional sira.
4. Primeiru-Ministru de'it maka bele submete ba Konsellu Ministrus projetu ka asuntu sira ne'ebé la hakerek iha orden traballus, hodi halo apresiasaun.

**Artigu da-6  
Votasaun**

1. Delibersaun Konsellu Ministrus nian iha validade, bainhira maioria absoluta husi membru sira, ne'ebé iha direitu ba votu, marka prezensa.
2. Delibersaun sira Konsellu Ministrus nian foti tuir konsensu, exetu, bainhira laiha konsensu, Primeiru-Ministru submete asuntu ne'e ba votasaun, no delibersaun sei foti tuir

maioria husi votu sira, husi nia membru sira ne'ebé mak iha direitu ba votu.

3. Primeiru-Ministru, Vise-Primeiru-Ministru sira, Ministru no membru Governu sira seluk ne'ebé maka substitui membru Konsellu Ministru nian ruma, mak iha direitu ba votu, tuir hakerek iha n. 2 husi artigu da-2 nian.
4. Primeiru-Ministru mak iha votu kualidade nian.

**Artigu da-7  
Deliberasaun sira**

1. Pontu ida-idak husi orden traballus nian ne'ebé diskute iha Konsellu Ministrus, sai nu'udar objetu husi deliberasaun hirak tuirmai ne'e:
  - a) Aprovasaun;
  - b) Aprovasaun ho alterasaun sira;
  - c) Adiamentu ba apresiasaun tuirmai iha sorumutuk seluk;
  - d) Rejeisaun;
2. Proponente sira ka Primeiru-Ministru bele dada filafali kualkér projetu husi diskusaun iha Konsellu Ministrus, to'o ba ninia deliberasaun.

**Artigu da-8  
Komisaun sira**

1. Lihusi deliberasaun Konsellu Ministrus nian, bele kria komisaun espesializada sira ne'ebé relasiona ba matéria ruma, ho karakter permanente ka temporáriu, ho funsaun atu halo koordenasaun ka análise, ba redasaun projetu sira kona-ba atu lejislativu ka polítiku, ka atu apresenta rekomendasan sira ba Konsellu Ministrus.
2. Kompozisaun, natureza, atribuisaun sira, organizaun no funsionamentu komisaun espesializada sira define iha deliberasaun Governu nian ne'ebé determina ninia kriaun.

**Artigu da-9  
Ata**

1. Husi sorumutuk Konsellu Ministrus nian ida-idak sei halo ata ida, ne'ebé tenke kontein, iha rezumu, no ho referénsia ba ninia orden traballus, elementu esensial sira hodi identifika deliberasaun sira ne'ebé maka foti ona, maka hanesan:
  - a) Fatin, loron hala'o sorumutuk nian no identifikaun membru Konsellu Ministrus ne'ebé maka marka prezensa;
  - b) Orden traballus;
  - c) Objetu no sentidu husi deliberasaun ne'ebé foti ona;
  - d) Identifikaun membru sira Konsellu Ministrus nian ne'ebé vota tiha ona kontra deliberasaun ne'ebé foti ona;

e) Identifikaun membru sira Konsellu Ministrus nian ne'ebé fô-sai tiha ona deklarasaun votu nian.

2. Bainhira trata kona-ba deliberasaun ne'ebé refere ba projetu atu nian ne'ebé hateten iha testu eskritu, objetu deliberasaun identifika tuir referénsia ba testu ne'e, ne'ebé sai aneksu ba ata.
3. Deklarasaun ba votu sira tenke apresenta liuhusi testu eskritu, ne'ebé sai aneksu ba ata ne'e, exetu bainhira refere ba deliberasaun kona-ba pontu ida ne'ebé la inklui iha orden traballus.
4. Sorumutuk sira iha gravasaun atubele rai nu'udar arkivu no membru Governu sira de'it maka bele konsulta, exetu bainhira, Primeiru-Ministru fô orden atu hapara gravasaun.
5. Servisu sira Prezidénsia Konsellu Ministrus nian mak elabora projetu ata nian, ne'ebé bele aprova iha minuta iha sorumutuk ne'e rasik, no sei vota no aprova iha versaun ikus iha sorumutuk Konsellu Ministrus nian tuirmai.
6. Projetu ata nian ne'ebé temi iha número anteriór, bainhira remata, sei fahe ba membru sira hotu Konsellu Ministrus nian, atu sira fô sira-nia opiniaun, karik sira hakarak fô, iha prazu loron serbisu nian lima.
7. Primeiru-Ministru no Ministru Prezidénsia Konsellu Ministrus maka sei asina ata orijinal definitiva no ata ne'e sei rai didi'ak iha servisu kompetente sira Prezidénsia Konsellu Ministrus nian.
8. Husi ata ne'e bele hasai sertidaun, tuir pedidu husi kualkér membru Governu nian.
9. Ata husi sorumutuk Konsellu Ministrus nian bele la asesivel ba públiku, no obrigatoramente la publika, tanba natureza husi kestaun sira ne'ebé inklui iha ata ne'e, tuir desizaun Primeiru-Ministru nian, sein prejuízu ba dispostu iha lei kona-ba asesu ba dokumentu administrativu sira.

**Artigu da-10  
Komunikadu imprensa**

1. Servisu sira husi Prezidénsia Konsellu Ministrus nian maka sei halo komunikadu imprensa ida, husi sorumutuk Konsellu Ministrus nian ida-idak, ne'ebé sei fahe, tuir orientasaun husi Ministru Prezidénsia Konsellu Ministrus.
2. Komunikadu imprensa, ne'ebé temi iha número anteriór, sei fô-sai ba meu komunikasaun sosiál sira iha lian ofisial sira, sein prejuízu ba enviu, bainhira posivel, iha mós lian serbisu nian sira, ba publikasaun ba serbisu Governu nian no ba publikasaun iha portál eletróniku Governu nian.

**Artigu da-11  
Devér solidariedade nian**

Membru Governu nian hotu-hotu vinkula ba desizaun sira ne'ebé foti ona iha Konsellu Ministrus, tanba ne'e, tenke defende no apoia deliberasaun hirak ne'e, maske marka prezensa ka lae iha sorumutuk ne'e, no sei la haree ba sira-nia pozisaun pesoál ka ba sira-nia votu.

**Artigu da-12**  
**Devér konfidensialidade nian**

1. Ho exesaun ba efeitu sira husi ezersísiu direitu partisipasaun nian ne'ebé sei halo tuir lei, bandu atu fô-sai kualkér projetu ne'ebé submete ona ka atu submete ba apresiasaun Konsellu Ministrus nian.
2. Ajenda, apresiasaun, debate, desizaun no ata sira Konsellu Ministrus nian konfidensiál, ho exesaun ba dispostu iha Rejimentu ida-ne'e kona-ba komunikadu imprensa, sein prejuízu ba dispostu iha lei kona-ba asesu ba dokumentu administrativu sira.
3. Gabinete membru Governu sira-nian, tenke hola medida hirak ne'ebé presiza, atu labele hamosu kualkér violasaun ba konfidensialidade ne'ebé impoin ona iha número anteriór.

**Artigu da-13**  
**Devér rezerva nian**

1. Sorumutuk Konsellu Ministrus nian la loke ba públiku, tanba ne'e, aleinde membru Governu sira ne'ebé integra Konsellu Ministrus, bele marka prezensa de'it maka tékniku sira ne'ebé atu fô apoiu administrativu no lojístiku ba Konsellu Ministrus, iha número ne'ebé presiza duni ba funsionamentu sorumutuk Konsellu Ministrus nian.
2. Bele marka mós prezensa iha sorumutuk Konsellu Ministrus nian, maka funsionáriu sira no ema sira ne'ebé Primeiru-Ministru rasik maka hili no mós tékniku sira ne'ebé akompaña membru Governu sira iha apresentasaun kona-ba projetu lejizlativu ka projetu seluk, bainhira presiza duni.
3. Partisipante hotu-hotu iha sorumutuk Konsellu Ministrus nian, la iha exesaun, kesi-an mós ba devér rai segredu no rezerva nian ne'ebé prevee ona iha Rejimentu ida-ne'e.

**Kapítulu II**  
**Prosedimentu lejizlativu**

**Seksaun I**  
**Dispozisaun Jerál sira**

**Artigu da-14**  
**Ámbitu**

1. Prosedimentu lejizlativu no normativu Governu nian tenke tuir regra no prinsípiu sira ne'ebé prevee ona iha Konstituisaun no iha lei, nune'e mós ba atu sira seluk ne'ebé Governu adota ona.
2. Dispostu iha kapítulu ida-ne'e aplika, ho adaptasaun hirak ne'ebé presiza, ba tramitasaun husi atu Governu nian no ba desizaun sira seluk, iha ne'ebé maka la prevee iha tramitasaun spesiál.
3. Projetu sira kona-ba atu Governu nian sira tenke hakru'uk ba regra prosedimentu no regra lejístika nian, ne'ebé aprova ona liuhosi rezolusaun Governu nian.

4. Asesu ba dokumentu sira ne'ebé prodús durante prosedimentu lejizlativu, relasiona ho projetu ida-idak ne'ebé submete ona ba Konsellu Ministrus, rezerva de'it ba membru Governu sira no ema sira ne'ebé maka hetan autorizasaun husi membru Governu sira-ne'e.

**Artigu da-15**  
**Konsertasaun**

1. Elaborasaun projetu atu normativu, mezmú hirak ne'ebé maka la presiza aprovasaun iha Konsellu Ministrus, servisu Ministériu proponente sira maka koordena ho servisu sira husi membru Governu sira seluk, liuhusi koordenasaun husi Prezidénsia Konsellu Ministrus.
2. Ba efeitu ida-ne'e, Ministériu ida-idak hili nia jurista ida hanesan pontu kontaktu ba produsaun lejizlativa, ne'ebé koordena, hamutuk ho servisu Prezidénsia Konsellu Ministrus nian, planeamentu lejizlativu, realizasaun estudu ba impaktu regulatóriu, fundamentasaun desizaun atu halo lei, foti desizaun ba polítika lejizlativa husi órgaun competente sira no redasaun ba ninia diploma sira.
3. Molok apresenta projetu atu normativu nian sira ba Konsellu Ministrus, tenke apresenta opsaun sira ne'ebé fundamenta desizaun atu halo lei ne'e, tuir regra lejístika ne'ebé vigora.

**Artigu da-16**  
**Audisaun sira**

Ministru proponente sei halo, bainhira bele, iha elaborasaun projetu atu normativu sira, mezmú hirak ne'ebé la presiza aprovasaun iha Konsellu Ministrus, audisaun, eskrita ka orál, ho ema ka entidade, públika ka privada sira, ne'ebé ninia partisipasaun importante tebes, liuliu, ba ema sira ne'ebé iha interese diretu iha aprovasaun ba projetu atu normativu ka hetan impaktu husi atu normativu ne'e, hodi hakerek iha ata ka súmula, rezultadu badak husi audisaun ne'e.

**Seksaun II**  
**Projetu atu normativu nian sira**

**Artigu da-17**  
**Enviu projetu nian**

1. Projetu atu normativu nian sira, no mós kualkér matéria sira seluk ne'ebé maka submete ba Konsellu Ministrus atu halo apresiasaun, Ministru proponente sei haruka ba Prezidénsia Konsellu Ministrus hodi deside kona-ba ninia admisibilidade, iha dalen português, no, karik bele, iha dalen tetun.
2. Projetu atu normativu nian sira tenke haruka obrigatoria-mente ho ninia suporte informátiku husi pontu kontaktu ne'ebé indika ona bazeia ba n. 2, husi artigu da-15.
3. Suporte informátiku, ne'ebé temi iha número anteriór, iha versaun *word*, tenke haruka ba enderesu eletróniku ne'ebé Prezidénsia Konsellu Ministrus indika ona.

**Artigu da-18**

**Dokumentu sira ne'ebé akompaña projetu sira atu normativu nian**

1. Projetu atu normativu nian sira tenke akompaña ho:
  - a) Nota justifikativa, ho asinatura husi Ministru proponente ka husi ninia substitutu;
  - b) Relatóriu badak kona-ba ata ka nota sira, ne'ebé prodús ona kona-ba dilijénsia sira hotu husi prosedimentu lejizlativu ne'ebé hala'o ona;
2. Dokumentu hirak ne'ebé temi iha número liubá ne'e ninia karakter hanesan dokumentu internu sira Governu nian no tenke tuir regra sira kona-ba rezerva no konfidensialidade ne'ebé prevee ona iha Rejimentu ida-ne'e.

**Seksaun III**

**Tramitasaun prosedimentál**

**Artigu da-19**

**Apresiasaun preliminar, devolusaun no sirkulasaun**

1. Projetu atu normativu sira ne'ebé apresenta sei hetan despaxu apresiasaun uluk nana'in husi Ministru Prezidénsia Konsellu Ministrus, ne'ebé bele delega.
2. Despaxu ne'e prevee iha número anteriór determina admisibilidade projetu atu normativu nian, ho ka sein suprimentu husi irregularidade saida de'it, ka ninia devolusaun ba entidade proponente, naran katak erru sira labele korrije kedas, karik:
  - a) Rekizitu no formalidade sira ne'ebé prevee iha Rejimentu ida-ne'e, iha Lei Publikasaun Atu sira nian no iha regra sira kona-ba lejístika ne'ebé vigora hela, la kumpre ona;
  - b) Forma atu normativu nian la adekuada;
  - c) Iha inkonstitusionalidade, ilegalidade, irregularidade ka defisiénsia goroseira ka flagrante.
3. Prezidénsia Konsellu Ministrus sei promove sirkulasaun projetu atu normativu sira ne'ebé admite ona ba prosedimentu lejizlativu ba membru Governu no entidade relevante sira, atu sira iha koñesimentu, partisipa no fõ paresér.

**Artigu da-20**

**Paresér Obrigatóriu sira**

1. Iha faze sirkulasaun, projetu atu normativu nian sira presiza paresér ne'ebé eskritu:
  - a) Husi Ministru Negósius Estranjeirus no Kooperasaun, projetu sira kona-ba atu normativu sira ne'ebé iha implikasaun ba área sira relasaun internasionál no kooperasaun nian, no mós iha área sira promosaun no defeza interese timoroan sira nian, ne'ebé hela iha rai-li'ur;

- b) Husi Ministru Finansas, projetu sira kona-ba atu normativu sira no atu sira Governu nian ne'ebé envolve aumentu ba despeza, hamenus reseita sira no kriasaun ka transformasaun natureza jurídika husi servisu Administrasaun nian, hodi fõ nia hanoin, liuliu, kona-ba impaktu ekonómiku-finanseiru husi medida ka medida sira ne'ebé propoin ona ba Konsellu Ministrus;
- c) Husi Ministru Administrasaun Estatál, projetu sira kona-ba atu normativu hirak ne'ebé refere ba desentralizasaun no administrasaun lokál;
- d) Husi Komisaun Funsau Públika, projetu sira kona-ba atu normativu hirak ne'ebé refere ba Funsau Públika;
- e) Husi Autoridade Rejiaun Administrativa Espesiál Oekusi Ambenu, projetu sira husi atu normativu hirak ne'ebé refere kona-ba atu lejizlativu sira ne'ebé direktamente bele afeta ba direitu sira Rejiaun Administrativa Espesiál Oekusi Ambenu nian, ne'ebé prevee iha Lei n.3/2014, loran 18 fulan-juñu.

2. Aleinde paresér sira-ne'ebé temi tiha ona iha número anteriór, tenke husu mós paresér ba ministériu relevante sira, liuliu matéria sira ne'ebé abranje husi projetu diploma ida-ne'e nian.

**Artigu da-21**

**Prosedimentu**

1. Paresér sira-ne'ebé temi ona iha artigu anteriór, tenke fõ-sai iha prazu loran serbisu nian sanulu, ka, iha kazu urjénsia nian ne'ebé define ona iha despaxu husi Ministru Prezidénsia Konsellu Ministrus, ka husi Ministru ne'ebé nia delega ba, iha prazu loran serbisu nian tolu, sura hahú husi ninia data sirkulasaun nian.
2. Bainhira laiha paresér eskritu ne'ebé fõ sai iha prazu ne'ebé prevee ona iha número anteriór, projetu atu normativu ne'e bele tau iha agenda atu halo diskusaun no aprovasaun iha Konsellu Ministrus, no sei admite katak Ministru kompetente ka Komisaun Funsau Públika bele fõ paresér iha sorumutuk Konsellu Ministrus nian. Sorumutuk Konsellu Ministrus nian ne'e atu halo diskusaun no aprovasaun ba projetu atu normativu sira tenke konvoka tuir n. da-2 husi artigu da-1.

**Artigu da-22**

**Objesaun no komentáriu sira**

1. To'o prazu sirkulasaun nian remata, membru Governu sira fõ sira-nia objesaun sira ka komentáriu sira kona-ba projetu ne'e, ho fundamentasaun ne'ebé adekuada.
2. Bainhira la signifika rejeisaun globál projetu nian, objesaun no komentáriu sira tenke inklui proposta sira kona-ba redasaun alternativa ba kestaun hirak ne'ebé maka foti ona, ne'ebé mak sei diskuti iha sorumutuk tékniku sira, ne'ebé temi iha artigu tuir mai.

**Artigu da-23**  
**Sorumutuk téknika sira**

1. Ministru Prezidénsia Konsellu Ministrus bele konvoka sorumutuk téknika preparasaun nian sira kona-ba sorumutuk Konsellu Ministrus nian, liuliu atu diskute versaun finál husi projetu atu normativu nian sira ne'ebé sei hato'o ba Konsellu Ministrus.
2. Iha sorumutuk sira-ne'ebé temi ona iha número anteriór, kualkér membru Governu ne'ebé mak iha interese bele partisipa, inklui tékniku no asesór sira husi sira-nia gabinete.
3. Projetu sira ne'ebé hetan apresiasaun iha sorumutuk téknika sira sai objektu husi rekomendasaun:
  - a) Ne'ebé sei konsidera katak iha ka lae, kondisaun ba ajendamentu nian iha sorumutuk Konsellu Ministrus, ho alterasaun ka lahó alterasaun sira;
  - b) Ne'ebé sei adia ba sorumutuk tuirmai, karik implika atu hanaruk diskusaun sira kona-ba ninia konteúdu;
  - c) Ne'ebé sei haruka filafali ba Ministériu proponente hodi halo reformulasaun, tanba iha rezerva sira ho número ida ne'ebé boot kona-ba ninia konteúdu.

**Artigu da-24**  
**Relatóriu**

Hafoin projetu atu normativu nian sira sirkula hotu ona, Prezidénsia Konsellu Ministrus nian halo relatóriu ida kona-ba dilijénsia sira ne'ebé halo ona, inklui paresér obrigatóriu no kontributu sira ne'ebé simu iha faze sirkulasaun, ne'ebé sei refere ba opsau sira kona-ba lejístika formál no materiál, hodi bele determina:

- a) Introdusaun ba alterasaun formál no materiál sira ba projetu diploma ne'e nian;
- b) Realizasaun dilijénsia sira kona-ba konsulta, estudu sira ka kualkér dilijénsia seluk ne'ebé konsidera konveniente;

**Seksaun IV**  
**Diskusaun no arkivu**

**Artigu da-25**  
**Ajendamentu**

1. Hafoin rekolla paresér obrigatóriu sira, hala'o audisaun fakultativa no sorumutuk téknika no halo alterasaun téknika eventuál sira, projetu sira kona-ba diploma ne'e, hamutuk ho dokumentasaun sira seluk ne'ebé prodús ona, sei haruka ba Prezidénsia Konsellu Ministrus hodi tau iha ajenda sorumutuk Konsellu Ministrus nian.
2. Projetu atu normativu nian sira labele debate iha Konsellu Ministrus, bainhira seidauk to'o loron sanulu, sura husi loron sirkulasaun nian, exetu bainhira iha desizaun ne'ebé klara husi Primeiru-Ministru, liuhusi proposta Ministru Prezidénsia Konsellu Ministrus nian.

**Artigu da-26**  
**Alterasaun ba projetu sira**

1. Kompete ba Prezidénsia Konsellu Ministrus nian, ho kolaborasaun husi Ministériu proponente diploma ida-idak nian, atu promove introdusaun, iha diploma sira, kona-ba alterasaun sira ne'ebé aprova ona iha Konsellu Ministrus, nune'e mós preparasaun testu finál nian no rekolla asinatura sira ba diploma tuir regra sira husi Lei Publikasaun Atu sira nian no rezolusaun ne'ebé vigora hela kona-ba lejístika ne'ebé aplikável.
2. Sorumutuk Konsellu Ministrus nian bele define prazu atu kumpre dilijénsia sira ne'ebé bele mosu hafoin aprovasaun ba diploma saida de'it, ida-ne'e hotu tiha ba redasaun ikus.
3. Bainhira, hafoin desizaun atu inklui iha ajenda sorumutuk Konsellu Ministrus nian, iha proposta atu halo alterasaun téknika substansiál sira, projetu ne'e tenke hasai husi ajenda sorumutuk Konsellu Ministrus nian no diskute fila-fali iha sorumutuk téknika.

**Artigu da-27**  
**Tramitasaun tuirmai**

1. Testu finál sira husi diploma sira, Prezidénsia Konsellu Ministrus sei submete ba Primeiru-Ministru atu asina, no, iha kazu balu ne'ebé mak ezije duni, sei asina mós husi Ministru sira ne'ebé iha kompeténsia kona-ba matéria ne'e.
2. Iha kazu ne'ebé urjente, Primeiru-Ministru bele determina atu asina diploma sira iha sorumutuk Konsellu Ministrus nian iha ne'ebé diploma hirak ne'e hetan ona aprovasaun.
3. Hafoin prosesu rekolla asinatura sira, proposta lei nian sira ka rezolusaun Parlamentu Nasionál nian sei haruka husi Primeiru-Ministru ba Parlamentu Nasionál.
4. Prestasaun informasaun komplementár sira, iha ámbitu promulgasaun ka asinatura diploma husi Prezidente República, nu'udar kompeténsia Primeiru-Ministru nian ka ba entidade ida ne'ebé mak Primeiru-Ministru indika.
5. Publikasaun ba atu lejíslativu sira Governu nian, nu'udar kompeténsia husi Ministru Prezidénsia Konsellu Ministrus nian.

**Artigu da-28**  
**Arkivamentu Dokumentasaun nian**

Arkivamentu dokumentu sira ne'ebé halo parte iha prosedimentu lejíslativu, nu'udar kompeténsia hosi servisu sira Prezidénsia Konsellu Ministrus nian.

**Kapítulu III**  
**Prosedimentu sira seluk**

**Seksaun I**  
**Atu sira seluk kompeténsia Konsellu Ministrus nian**

**Artigu da-29**  
**Aprovasaun ba atu sira seluk kompeténsia Konsellu Ministrus nian**

Dispostu iha kapítulu anteriór sira sei aplika, ho adaptasaun hirak ne'ebé presiza, ba prosedimentu aprovasaun ba atu sira seluk nu'udar kompeténsia Konsellu Ministrus nian.

**Artigu da-30**  
**Publikasaun atu normativu sira seluk**

1. Atu normativu sira ne'ebé la presiza aprovasaun iha Konsellu Ministrus, sei haruka ba Ministru Prezidénsia Konsellu Ministrus atu publika iha *Jornal Repùblika*, sein prejuízu ba devér konsertasaun nian ne'ebé prevee ona iha artigu da-15.
2. Atu kumpre dispostu iha número anteriór, orijinal husi atu hirak ne'e, akompaña ho ninia suporte informátiku iha versaun *word*, sei haruka husi pontu kontaktu Ministériu ida-idak nian ba Ministru Prezidénsia Konsellu Ministrus ka ba ema ne'ebé mak hetan delegasaun husi Ministru ne'e rasik.

**Seksaun II**  
**Regulamentasaun atu lejislativu sira**

**Artigu da-31**  
**Prosedimentu regulamentasaun nian**

1. Governu garante aprovasaun ne'ebé adekuada no tuir tempu, ne'ebé determina ona ba regulamentu administrativu sira, ne'ebé sai nu'udar ninia kompeténsia, bainhira presiza atu konfere ezequibilidade ba atu lejislativu sira ka iha eziénsia husi atu hirak ne'e rasik.
2. Ministru Prezidénsia Konsellu Ministrus maka kria no jere mekanizmu sira kona-ba kontrolu ba prazu regulamentasaun nian husi atu lejislativu sira no fó hatene periodikamente ba membru Governu sira ne'ebé iha kompeténsia kona-ba matéria ne'e no ba Konsellu Ministrus kona-ba kumprimentu ba prazu sira-ne'e.

**Seksaun III**  
**Atu sira husi Direitu Internasionál**

**Artigu da-32**  
**Aprovasaun ba atu sira husi Direitu Internasionál**

1. Aprovasaun ba atu sira husi Direitu Internasionál nian ne'ebé sai nu'udar kompeténsia Konsellu Ministrus nian, tuir Konstituisaun no lei, sei halo liuhusi rezolusaun Governu nian.

2. Konsellu Ministrus aprova Dokumentu sira Plenu Podér nian sira, ne'ebé prevee iha Konstituisaun no iha lei, ho deliberasaun Konsellu Ministrus nian, exetu iha kazu hirak ne'ebé ezije forma seluk, tanba interese públiku nian ho justifikasaun ne'ebé loloos.
3. Titulár husi Dokumentu Plenu Podér nian sira ne'ebé prevee iha artigu anteriór informa Konsellu Ministrus kona-ba ninia utilizasaun iha prazu ida ne'ebé prevee ona.
4. Ba atu sira ne'ebé prevee iha número anteriór sira, nune'e mós ba proposta rezolusaun nian sira ba Parlamentu Nasionál ne'ebé sei aprova atu sira husi Direitu Internasionál ne'ebé sai nu'udar Parlamentu Nasionál nia kompeténsia, sei aplika, ho adaptasaun hirak ne'ebé presiza, dispozisaun sira kona-ba prosedimentu lejislativu.

**Kapítulu IV**  
**Dispozisaun final sira**

**Artigu da-33**  
**Apoiou ba Konsellu Ministrus**

Apoiou ba sorumutuk sira Konsellu Ministrus nian, liuliu apoiu jurídiku, tékniku no lojístiku sei halo hosi asesór no funsionáriu sira hosi servisu kompetente sira husi Prezidénsia Konsellu Ministrus no husi Gabinete Primeiru-Ministru nian, tanba ne'e sei la permite ema sira ne'ebé la hetan konvite atu tama iha sorumutuk sira Konsellu Ministrus nian.

**Artigu da-34**  
**Koordenasaun kona-ba prosedimentu lejislativu**

1. Regulamentasaun hotu-hotu ne'ebé presiza ba ezeekusaun di'ak Rejimentu ida-ne'e nian, kona-ba asesu no apoiu tékniku, administrativu no lojístiku ba sorumutuk téknika sira no ba sorumutuk sira Konsellu Ministrus nian, sei aprova liuhusi despaxu Ministru Prezidénsia Konsellu Ministrus nian.
2. Konkretizasaun ne'ebé presiza ba elaborasaun di'ak, aprovasaun no ezeekusaun diploma normativu sira hosi Governu, sei hetan aprovasaun liuhusi despaxu husi Ministru Prezidénsia Konsellu Ministrus, exetu, kona-ba definisaun regra lejisatika nian sira ne'ebé sei regula elaborasaun projetu sira kona-ba atu normativu sira.
3. Konkretizasaun ne'ebé temi iha número anteriór tenke prevee kontrolu kona-ba regularidade formál no validade jurídika husi diploma ministeriál sira no atu sira seluk husi natureza regulamentár, molok ninia publikasaun, hosi servisu jurídiku Prezidénsia Konsellu Ministrus nian sira, liuliu ho objetivu atu evita publikasaun diploma ministeriál sira ne'ebé la obedese ba regra lejisatika materiál no formál ne'ebé vigora hela.

**Artigu da-35**

**Monitorizasaun ba aplikasaun atu lejizlativu sira nian**

Governu promove estudu hirak ne'ebé presiza ba avaliasaun kona-ba ezekusaun no aplikasaun husi atu lejizlativu sira Governu no Parlamentu Nasionál nian no avaliasaun ba aprovasaun medida sira kona-ba simplifikasaun no reorganizasaun lejizlativa.